

O Se Opo mo José

Na iloa e Atamu e tatau lava ona ia lototele.



Saunia e Carolina Maldonado
(E faavae i se tala moni)

Na tupu leni tala i Polivia.

“Ha! E te le iloa se mea!” Sa tusi e Fabricio lona tamai lima ia Jose ma ata.

Sa faauu Atamu. Faatoa fai atu lava e José se fesili i le faiaoga. Sa le manaia le tafaalili atu o Fabricio ia te ia mo lena mea.

“Fabricio, ua lava lena,” o le tala lea a le faiaoga.

Sa tilotilo atu Atamu ia José. Sa sioa ifo o ia i lana api, e pei na te le'i faalogo ia Fabricio.

Sa fou José i le latou aoga. I le taimi muamua, sa leai se tasi na talanoa ia te ia. Ona amata lea e nisi o tamaiti ona tafaalili ia te ia. Sa latou valaau o ia i igoa i taimi uma ma talie atu ia te ia. Sa lagona e Atamu e tatau ona ia fesoasoani ia José, ae na te le'i iloaina lava se tala e fai atu.

Ma le isi, sa foliga lelei lava José. Sa foliga mai o le tafaalili sa le'i faalavelave ia te ia.

Na toe liliu atu Atamu i lana tusi. Sa i ai se suega tele o le matematika o loo latalata mai, ma sa tatau ona ia taulai atu i ai.

I le aso o le suega, sa faia e Atamu le mea sili na te mafaia, ae sa faigata! Sa popole o ia i lona togi. Ae a pe afai e le pasi?

O le aso na sosoo ai, sa tu ai lo latou faiaoga i luma o le potu ma se faaputuga pepa.

“Ua ia te d'u togi o a outou suega,” na ia fai atu ai ia i latou. “O le toatele o outou e i ai le avanoa e faaleleia atili ai, ae o nisi o outou sa lelei tele.”

Sa amata ona ia faitauina leotele togi a tamaiti aoga taitasi. O le tele o togi sa matuai maualalo lava. Sa faatalitali ma le naunautai Atamu mo lona igoa.

“Atamu,” o le tala lea a le faiaoga. “Valusefulu.”

Sa le talitonu Atamu. Sa pasi o ia. Sa ataata lapoa o ia.

Ona faitau lea e le faiaoga o le togi a José.

“Tasi le selau,” sa ia fai atu ai, leotele ma manino.

“O se togi atoatoa.”

Na tu i luga Fabricio. “E leai!” sa ia ee atu ai.

“Sa kopi Jose!”

“Toe!” o le tala lea a se isi tamaitiiti. “Na te le iloa se mea. Atonu na ia kopi i se tasi.”

Sa auai atu i ai isi tamaiti aoga. Sa taumafai Jose e ta'u atu ia i latou e le'i kopi, ae latou te le'i faalogo. Sa taumafai le faiaoga e ta'u atu ia i latou e filemu, ae latou te le faalogo foi ia te ia.

“Kopi!” sa ee atu ai se tasi.

“Pepelo!” o le tala lea a se isi tagata.

Sa tatavale le fatu o Atamu. Sa ia le iloa po o le a le mea a fai. Sa ia tilotilo atu ia José. O le a lelei o ia, a ea? Sa to'a lava José i taimi uma.

Sa sioa atu José i lana kesi e pei ona ia faia i taimi uma. Ona amata lea ona tagi.

Sa le toe feei isi tamaiti, ma sa filemu le potu. Na pau lava le mea na mafai ona faalogo i ai Atamu o le leo o José o tagi. Sa ia iloa e le mafai ona ia nofo pea i le taimi leni. Sa tatau ona lototele o ia. Sa ta'u atu e le Agaga Paia ia te ia e fesoasoani ia Jose.

Na tu i luga Atamu. Sa vaavaai atu isi

tamaiti ia te ia a o ia savali atu ia Jose. Sa le iloa lava e ia se tala e fai atu. O lea sa ia punou ifo ai i lalo ma fusi mau José.

“Aua e te popole,” sa ia musumusu atu ai a o ia popoina le tua o José. “Aua e te popole.”

E le'i umi ae o mai foi isi tamaiti e fusi José. E oo lava ia Fabricio na sau ma faamalie atu. E le'i umi ae tutu le vasega atoa faataamilo ia José e faamalie ma faafiafia o ia.

“Matou te alolofa ia te oe, José!” o le tala lea a se tasi.

“O oe e sili ona lelei i le matematika!” o le tala lea a le isi.

Sa solo ese e José ona loimata ma ataata. Sa ataata foi Atamu. O le agalelei na manaomia ai le lototele, ae sa matuai aoga lava. ●

